

1 Tesalonicenses

Jacheuayama

1 ¹ Atše Pablo, Silvano y Timotéoftaca, quem tsbuanácha sèntsabiamná tšëngaftangbiana, chë Tesalónica bëts puebloca Jesucristbeñe ošbuáchiyëngbiana, tšëngaftanga chë Bëngbe Bëtsá chë Taitá y Bëngbe Utabná Jesucristoftaca cánÿiñe mo canÿacá šmognënga. Atše séntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnama, y tšëngaftanga ainaniñe tšabe ebionana chašmotsebonnama.

Pablo Bëngbe Bëtsábioye tbojtanchuá chë Tesalónica pueblentša entsangbe ošbuáchiyama

² Bënga sempre Bëngbe Bëtsá fsëndëtschuaná tšëngaftangbiana, y bënga cháftaca ftsencuënta ora, tšëngaftangbiana fchandbëtseimpadana. ³ Bënga, Bëngbe Bëtsá chë Taitáftaca ftsencuënta ora, fsëndbëtseñojuabnaye ntšamo tšëngaftanga šmotrabájama, Jesucristbeñe ošbuáchiyana šmobómnayeca; ntšamo tšëngaftanga tša ínÿenga šmëjabuáchana, Jesucristo šmobobonshánayeca; y ntšamo tšëngaftanga, ndocna te ntjajbanacá, jtsošbuáchiyëse Bëngbe Utabná Jesucristbeñe šmobátmanama. ⁴ Jesucristbeyeca

catšátanga, bënga fsëndétatšëmbo Bëngbe Bëtsá cmababuánÿeshanama, y cha tcmojábacacama chábenga chašmotsemnama. ⁵ Bënga chë tšabe noticiënga Jesucristbiana tcbonjanabuayená ora, ndoñe nÿe bënga jóyebuambayëse chca quenjatsmëna, ndayá chë Uámana Espíritbe obenanácna, y bënga corente jtsejuabnaye chë buayénana ndegombre soye bëtsemnama. Tšëngaftanga corente šmondétatšëmbo ntšamo bënga ftsjamna tšëngaftangaftaca fsënjamna ora, tšabe soyënga tšëngaftangbiana nguayíñe.

⁶ Chora, ntšamo bënga fsëñjanamcá y ntšamo Bëngbe Utabná enjanियená, tšëngaftanga šmonjanontšë amana; y chë buayénana šmonjanóyëngacñe chë Uámana Espiritu tcmojanatšatá oyejuayánaca, masque ínÿenga tmojamna tšëngaftanga puerte chašmosufrima. ⁷ Mëntšá, tšëngaftanga uánatsanënga šmonjanobiana ntšamo ndegombre jtsiyenama, nÿetsca Macedonia y Acaya luarentša Jesucristbeñe ošbuáchiyëngbiana.

⁸ Tšëngaftanga šmojoyebuambá Bëngbe Utabná Jesucristbe palabrama. Mora, ndoñe nÿe Macedonia y Acaya luarentše entsanga chama quemátstatšëmbo —nÿets luarenache entságnaca montsetátšëmbo ntšamo tšëngaftanga Bëngbe Bëtsábeñe

šmojtsošbuáchema —y chca, bënga tondaye más quešnátëjaboto tšëngaftangbiama jatichámuama. ⁹Cach entsànga montsoyebuambná chë bënga tçbonjánabuache ora tša tšabá tšëngaftanga šcojanébuajama. Chëngnaca montsichamo ntšamo tšëngaftanga šmojtsajbaná chë šmojanjuabná diosënga yojamna soyënga adórayana y šmojanontsé chë tšabe benache jtishachama, y chë Bëngbe Bëtsá ndegombrá y ainá jasérviana, ¹⁰y chca, chabe Uaquiná Jesús jobátmama; mua celocana echanjésabo; chabiana Bëngbe Bëtsá tojanma obanënguentshana cháuatayenama, y cha šochanjátsebacaye chë uabouana castigüentshana, Bëngbe Bëtsá entsàngbe bacna soyëngama chëngbiama yobomnentshana.

**Ntšamo Pablo yojantrabája
Tsalónica puebloa**

2 ¹Cach tšëngaftanga, Jesucristbeyeca catsátanga, šmondétatšëmbo bënga tçbonjánabuache ora ndoñe nye bonamente quenjatsmënana. ²Tšëngaftanga šmondétatšëmbo, bënga cabá tšëngaftangbioye nda ora, Filiposoca šonjanëyánguango y bacá šonjánaborlama; y masque tšëngaftangbioca bëngbe contra entsànga monjamna, Bëngbe Bëtsá tonjanma bënga fchayobená chë tšabe noticiënga bëtsá añémoca jabuátambama. ³Er bënga entsángbioye bostero soyënga ndoñe queftsjanabuayiyá, tšëngaftangbiama bacna soyënga ndoñe queftsjanboše, y entsànga jáingñama ndoñe queftsjanoyebuambná. ⁴Bëngna inyetsá; Bëngbe Bëtsá yojanjuabná

bënga chabe trabajo jamama obenënga ftsjamna ca, y chca, šonjanëbuáyana chabe tšabe noticiënga entsànga jabuátambama, y chca bënga fsëndoyebuambná; chíyeca bënga ndoñe nye entsàngbe bominyiñe tšabá chaotsinýnama queftsátama, ndayá nye Bëngbe Bëtsabiama, nda chë ndayá bëngbe ainaniñe yomnama yotátšëmbo. ⁵Ntšamo tšëngaftanga corente šmondétatšëmbcá, bënga ndocna te tšëngaftangbiama tšabe soyënga tifjánayana, tšëngaftanga béngaftaca oyejuayënga chašmotsemnana; y ntšamo tšëngaftanga cbonjanëtsësnacá ndoñe quenjatsmëna nye tšëngaftangbentshana ba soyënga bëngbiama josháchiñama. Bëngbe Bëtsá chama yotátšëmbo. ⁶Ndocna te bënga queftsatsngúá entsànga más uamanëngcá bënga chašotsabiamnama, ni tšëngaftangbentshana, ni inýengbentshana.

⁷Masque bënga, Cristbe ichmónënga bëtsemnana, matifjanobená tšëngaftanga nye sempre jtsamëndayana, bënga ndoñe chca chibiátanma; bënga corente jtsababuányeshanëse cbonjánanyëna, ntšamo canye mamá chabe básenga jtsabéçhayana y corente bonshanánaca jtsanyënana. ⁸Tša cbonjánababuanýeshanayeca, bënga ndoñe nye chë Bëngbe Bëtsabe tšabe noticiënga checbënjatanabuayená, tšëngaftanga chiñe chašmotsošbuáchema ntšamo bënga fsëndošbuachecá, ndayá bëngbe vidënga jáshbiamnaca fsënjanprontana tšëngaftangbe tšabiama. ¡Tša cbondábabuanýeshana! ⁹Jesucristbeyeca bëngbe catsátanga, tšëngaftanga šmenabouíñna ntšamo bënga bëtscá y jabuache fsënjantrabajama, Bëngbe Bëtsabe

tšabe noticiënga abuayiyнайиñe y bëngbe vida onguayiyñe, chca, tšëngaftanga ndoñe chacmondëtsamnama bëngbe uajabótama bënga jatatsatnayama.

¹⁰Cach tšëngaftanga šmondëtatšëmbo y Bëngbe Bëtsánaca, ntšamo bënga ftsjamna tšëngaftanga chë ošbuáchiyëngaftaca fsënjamna ora; fsënjaniyena ntšamo Bëngbe Bëtsá tšabá tbojtsinýancá, nyetscángaftaca fsënjánama ntšamo jamama šojanamncá, y ndocná quenátobena jatichámuana ntšamo fsënjamncá ndoñe tšabá yonjamna ca. ¹¹⁻¹²Tšëngaftanga šmondëtatšëmbo, bënga bëtscá jóyebuambayëse cada ona tšëngaftanguentšá cbonjanéjabuachanama y cbonjánanëmuama, ntšamo canýe taitá chabe básëngaftaca endbetsamncá. Bënga bëtscá cbonjanëtsëtsná ntšamo Bëngbe Bëtsá tšabá tbojtsinýancá chašmotsiyenama; y Bëngbe Bëtsá cmontsëbuájajana chabe amëndayoye jamashënguama y chabe obenana y buashinýinýanana jinýama.

¹³Bënga, Bëngbe Bëtsabe tšabe soyënga cbonjanabuayiyná ora, ntšamo tcbonjanëyancá tšëngaftanga šmonjanuena y šmontsanošbuaché mo Bëngbe Bëtsábíocana buayenanancá, y ndoñe nýe entšangbe oyebuambnayancá. Y ndegombre Bëngbe Bëtsabe buayenánana endmëna, y chë palábraca, tšëngaftanga chë chábeñe ošbuachiyëngbeñe Bëngbe Bëtsá bëtscá soyënga yojtsama. Chama sempre Bëngbe Bëtsá fsëndëtschuaná. ¹⁴Jesucristbeyeca catsátanga, cach tšëngaftangbe luarentša entšanga cmonjanëcamena ora y šmonjansufrina, šmonjanpasá ntšamo chë Judeoca Bëngbe Bëtsábeñe ošbuachiyëngcá nefjuañënga tmonjanpasacá, y

chëngna Cristo Jesusbe entšanga mondmëna. Chënga tmonjansufrí cach luarentša entšanga, chë judiënga, chëngbioye monjanëcamena ora. ¹⁵Chë judiëngbe bëts taitanga, Bëngbe Bëtsabe juabna oyebuambnayëngbioye tmojtsanëbaye, y ntšamo chëngbe bëts taitanga tmojanmncá, chëngnaca Bëngbe Utabná Jesúsbioye tmojanóba, y chënga mondama bënga chaftsesufrínama. Chënga ndoñe tšábënga Bëngbe Bëtsabe bominyñe quemátsmëna, y nyetsca entšangbe contra montsemna. ¹⁶Chë ndoñe judiëngbioye, Bëngbe Bëtsá cháuatsebacama jábuayenama fstseboše ora, chë judiënga bëtscá jtsamana bënga ndoñe fchandobenama chca jamama. Judiënga nyets tempo bacna soyënga monjánama; pero chë entšanga jábuayenama bënga ndoñe fchandobenama jtsamana, entsemna chë último bacna soye ntšamo chë judiënga jamama imojtsobencá, más ya ndoñe; y mora, cabana, Bëngbe Bëtsá ya puerte chëngaftaca tbojetna y echanjácastigaye.

**Pablo tša yojánboše, Tesalónica
puebloca entšanga jáñyama**

¹⁷Jesucristbeyeca catsátanga, bënga tšëngaftangbentšana baseftayté jëftsebocnama šonjanotocá ora, masque ndoñe choca tšëngaftangaftaca queftsátanmëna, sempre tšëngaftangbiama fsënjanenajuabná, y tša fsënjánboše tšëngaftangbioye jtësana jautsëtsayama. ¹⁸Bënga fsënjánboše tšëngaftangbioye jésana; chíyeca cach atše Pablo, ba soye sënjanóshenguënja jobenayama choye jésama, pero Satanás yojantrabája bënga ndoñe fchandobenama chca jamama. ¹⁹Atše séntsanboše tšëngaftanga jautsëtsayama, er

tšëngaftangbeyeca Bëngbe Utabná Jesusbe delante, cha yochjésabo ora, ntšamo tšëngaftanga šmoyenama, bënga puerte jtsošbuáchiyëse fchantsobátmana, corente oyejuayënga fchtsemnama y más bëtsétsanga fchtsemnama. ²⁰ Aíñe, ndegombre, ntšamo tšëngaftanga šmoyenama, bënga bëtsá añémoca ntšamo tšëngaftangbeñe tifjamama fsëndbétsoyebuambnaye, y tša oyejuayënga fséntsemna.

3 ¹ Chíyeca ya ndoñe chibiatanobená más jatobátmanana tšëngaftanga jautsëtsayama; as fsënjanjuabó nÿe bëndata Atenas bëts pueblentšë joquédana, ² y jíchmuana Jesucristbeyeca bëngbe catšata Timoteo, chë bëngaftaca trabajayá, Bëngbe Bëtsábioye oservéniñe, tšabe noticiënga Cristbiama entsanga abuayinyaiñe. Fsënjanichmó chacmañémuayama y chaotsamama tšëngaftanga Jesucristbeñe más chašmotsošbuáchema; ³ y chca, ndocná Jesucristbeñe ošbuáchiyana chaondájbanama, masque tšëngaftanga Jesúsbeñe ošbuáchiyënga bétsemnama, ínÿenga imojtsama chašmotsesufrínama. Er cach tšëngaftanga šmondétatšëmbo bënga šojtsamna chca quem luarentšë jëftsepapadecánana. ⁴ Y cabá tšëngaftangaftaca fsënjëftsemna ora, tcbonjanéyana bënga šojánamna jasúfriana; y ndegombre chca tonjopasá, ntšamo tšëngaftanga ya šmondétatšëmbcá. ⁵ As y chë tšëngaftangbiamá jtsetatšëmbuama más jatobátmanana ndoñe quetstétsobenayeca, sënjanjuabó šojétsemna Timoteo jíchmuana. Sënjanichmó atšë jtsetatšëmbuama aíñe bëtsá o ndoñe tšëngaftangbe

ošbuáchiyana Jesucristbeñe tayoJamnama, er atšë yapa sënjanjuabná nderado Satanás tojanma tšëngaftanga bacna soyënga chašmotsamama, y chca, bëngbe trabajo tondayama chaondëtsosevénama.

⁶ Pero mora, Timoteo tšëngaftangbiocana tontashjango y tonjúshjango noticiënga, y bënga chama oyejuayënga fséntsemna, ntšamo tšëngaftanga bëtscá Jesucristbeñe šmojtsošbuáchema y nÿetscanga šmenbobonshánama. Cha šonjacuntá ntšamo tšëngaftanga corente oyejuayënga bëngbiamá šmuatenujuabnama, y ntšamo tšëngaftanga tša šmojtseboše bënga jányama, cachcá ntšamo bënga tšëngaftanga jányama tša fsëntsebošcá.

⁷ Quem sóyeca, Jesucristbeyeca catšátanga, y mora chë bënga nÿetsca chë padecena soyënga ftsebomna ora y ínÿenga bënga jasúfriana imojtsama ora, bëts añemo fséntsebomna, ntšamo tšëngaftanga tša Jesucristbeñe šmojtsošbuáchema jtsetatšëmbëse.

⁸ Jtsetatšëmbuana tšëngaftanga sempre puerte tšabá Bëngbe Utabnáftaca šmoyenama, entsama bënga más añémoca chaftsiyenama. ⁹ Mora fchantsobena Bëngbe Bëtsá jtsatschuanayana tšëngaftangbiamá, y chë tšëngaftangbeyeca chabe delante bënga oyejuayana ftsbomnámnaca. ¹⁰ Cada te, bnété y ibeta, tša Bëngbe Bëtsá fsëndétseimpadana jobenayama tšëngaftanga jautsëtsayama chašualesenciama, Bëngbe Bëtsabe palabra tšabá chašmobedecema, chë buayenánana ntšamo yojtsashbencá jabuátambama.

¹¹ Bënga, Bëngbe Bëtsá fsëntseimpadana, cachá y Bëngbe Utabná Jesús, chašújabuache bënga

fchayobenama tsëngaftangbioye jama jautsëtsayama. ¹² Y Bëngbe Utabná chaoma más bëtscă chásmotsenbobonshánama, y cachcă corente nyetscăngaftaca, ntšamo bënga cbondababuanyëshancá. ¹³ Chca, tsëngaftangbe ainaniñe bëtscă añemo šmochántsebonna; y Bëngbe Utabná Jesús cachábengaftaca chaojésabo ora, Bëngbe Bëtsá Bëngbe Taitabe delante ndocná chaodayana, ntšamo tsëngaftanga šmojamcă ndoñe tšabá yontsemna ca, er tsëngaftanga šmondmëna Bëngbe Bëtsábenga, nye cha jtseservénama.

Ntšamo jtsiyenama, Bëngbe Bëtsá oyejuayá chaotsemnana

4 ¹ Y mora inye palabra šmochjatspasencia. Jesucristbeyeca bëngbe catšátanga, tsëngaftanga bëngbentsana šmonjanatsjinye ntšamo jtsiyenana cmojánamna, ntšamo Bëngbe Bëtsábioye oyejuayá jabemama yomncá, y ndegombre chca tsëngaftanga šmondoyena. Y mora Bëngbe Utabná Jesusbe cuenta, cbontsaimpadana y becá cbontsëtsësná más chca chašmotsamama.

² Tsëngaftanga šmondétatšëmbo ndayá tifjánayana ntšamo tsëngaftanga chašmotsiyenama, y chca fsënjama Bëngbe Utabná Jesús chca jamama šonjanamëndáyeca.

³ Bëngbe Bëtsá endboše tsëngaftanga chašmotsiyenama mo Bëngbe Bëtsabengcă, ndocná bacna soyënga boyabása o shembásaftaca chaondétsamama, ⁴ y nyetscanga chamotsobena ntšamo canye shema jonguanguana, chë ntšamo canya Bëngbe Bëtsábia yomná jamama ibomncá, y ntšamo entsangbe bominjiñe tšabá yomncá, ⁵ y ndoñe

chabondónguango nye cháftaca bacna soyënga chëngbe cuérpoca jamama, ntšamo chë Bëngbe Bëtsábioye nduabuátmënga mondbetsamcă. ⁶ Chë palabrine ndocná chabe catšátbioye chabondëingñe, chë catšatbe shémaftaca bacna soye jamëse, er chca amëngbioye Bëngbe Utabná corente echanjácastigaye. Chíyeca bënga ya bëtscă chama tcbonjabuayená. ⁷ Er Bëngbe Bëtsá ndoñe šonjánachembo bacna soyënga boyabása o shembásaftaca jtsamama, ndayá ntšamo tšabá yomncá jtsamama, ntšamo chabe entsanga mondbetsamcă. ⁸ Mëntšá, nda quem buatëmbana soyënga tojtsábotena, cha ndoñe nye entsanga jtsëbátenana, ndayá Bëngbe Bëtsábioye, nda tsëngaftangbe ainaniñe Uámana Espiritu cháumashënguama tojama.

⁹ Atše ndoñe quešnátsmëna juabuábiamana ntšamo cmojtsamna inyënga Jesucristbeñe ošbuáchiyënga jtsababuányëshanama, er cach Bëngbe Bëtsá tcbonjabuatambá nyëtscanga chašmotsenbobonshánama. ¹⁰ Y ndegombre, tsëngaftanga chca šmondama nyetsca Macedonia luarentše Jesucristbeñe ošbuáchiyëngaftaca. Pero cbontsaimpadana, Jesucristbeñe catšátanga, más chca chašmotsamama.

¹¹ Nya sempre quem soyënguiñe šmochtsentsëna: natjëmbana jtsiyenana, inyëngbe soyënguiñe ndoñe ntsonremeténana, y ndoñe ntjatobatmanana nye inyënga tsëngaftangbiama chamotsetrabájama, ntšamo tcbonjanëyancá tsëngaftangaftaca fsënjama; ¹² chca šmochtsama, chë inyënga Jesucristbeñe ndošbuáchiyënga chacmotsarrespetánama, y ndocnábeñe ntjatobatmancă šmochantsobena jtsiyenana.

**Bëngbe Utabná quem
luaroye yochjésabo ora**

¹³ Bëngbe catsátanga, bënga fséntseboše tsëngaftanga ndegombre chašmotsetátšëmbo ntšamo chë obanéngaftaca yochjopásama, y chca, tsëngaftanga ndoñe ngmenánaca chašmondétsemnana, mo chë inyengcá, chë tcojóbanentsana ndoñe yontsemna jtayenama ca juabnayëngcá. ¹⁴ Bënga fsëndošbuaché Jesús tojanóbana y tojtayanenama, y cachcá bënga fsëndošbuaché chë tmojóbanënga y Jesúsbeñe tmojtsošbuáchese, Bëngbe Bëtsá chëngbiana yochjama chë nyetsca tescama yomna tšabe vida Jesucrísoftaca chamotsebmomnana, y quem luaroye cháftaca chamuatábama.

¹⁵ Chë soyama bënga cbontsëtsësná ntšamo cach Bëngbe Utabná tojéftsanabatambacá: Bëngbe Utabná chaojésabo ora, chë ošbuáchiyënga chë te cabá ainënga chamojtsemnënga, chábioye ndoñe quemochátinyëna tsbanánoca, más natsana chë ya obanënga chë te mochtayenëngbiana. ¹⁶ Er entsanga mochanjouena canyë mando juayebuáchenana, chë angelëngbe amëndayabe oyebuambnayana y chë Bëngbe Bëtsabe trompetéfjua juajatétámnaca, y chora cach Bëngbe Utabná celocana echanjástjango. Y chë tmojóbanënga, Crístbeñe imojanošbuachenga, natsana mochántayena; ¹⁷ chentsána, chë ainënga chamojtsemnënga chëngaftaca cányine Bëngbe Bëtsá sochanjúyamba, Bëngbe Utabná yochtsemnoca jashjanguama, chë celoca jantšetëshënga endmënocá; as chentsána nyetsca tescama cháftaca bënga mochántsemna. ¹⁸ Quem palabréngaca nyetscanga ndoñe más ngmënanana ainaniñe chašmondétsebmomna.

5 ¹ Jesucrístbeyeca catsátanga, ndoñe quenátsiyta atše jubuábiamana mocna ora chë soyënga yochjopásama. ² Cach tsëngaftanga corente šmondétatšëmbo, Bëngbe Utabná yochjésabo chama ndocná chaondétsejuabná ora, mo canyë atbëbanacá jashjanguana ibeta ndocná chama tonjatsjuabná ora. ³ Entšanga chamojayana: “Lempe tšabá endëtsomñe y tondayama quešnátamna játauatjana ca”, chora nyë ndeolpe chë entsangbiana tša jasúfriama echanjóshjango, mo canyë shembása šešona jtsebmomnana ora nyë ndeolpe jasúfriama jóntšancá; y ndegombre, entsanga chca jasúfriama quemochatotsbocá. ⁴ Pero tsëngaftanga catsátanga, ndoñe quešmátiyena mo ibetiñcá, bacna soyënga jtsejuabnayëse y jtsamëse; y chca, Bëngbe Utabná chaojésabo ora, tsëngaftanga ndoñe auatjanánënga quešmochátsmëna, mo ndábioye canyë atbëbaná tbojotbá ora, chábioye cuaftsauatjanacá. ⁵ Nyetsca tsëngaftanga šmondmëna entsangbe juabna binýnayabe básenga, y mo binýniñcá šmondoyena. Bënga ndoñe chë ibetiñe mandayabe básenga quemuátsmëna, y mo ibetiñcá ndoñe quemuátiyena; ⁶ chíyeca bënga ndoñe quešnátamna jtsemnana mo chë cachëngbe cuerpo jenomándama ndobenëngcá, chë mo cuafsemangcá oyenënga. Pero aíñe šontsamna mo chë fšnëngcá jtсийenana, bëngbe cuerpo jtsemándayëse y nyets tempo jtseprontánëse. ⁷ Ibeta ora entsanga jtsemangana, y cach ibeta tojtsemna ora entsanga jotmenangana; ⁸ pero bënga, chë binýnentšëngna, šontsamna sempre bëngbe cuerpo jtsemándayana. Šontsamna Bëngbe Bëtsábeñe jtsošbuáchiyana y cha

jtsebobonshánana, chë uayaná Satanasbiama jenéuyanama y cha jayénjanama, mo canye soldadca, canye morocho soye cochaca jenácochjatsana jtsevalentiana y ndoñe chamondëyénjanama. Y chë castigüentsana Bëngbe Bëtsá sochjátsebacamnaca puerta jtsošbuáchiyëse jtsobátmanana; y chca, bënga mochántsemna mo canye soldadca, cha canye casquëse juabuchëtsana jenéuyanama. ⁹Er Bëngbe Bëtsá ndoñe šonjáchembo bënga chašotsamna chë nyetsca tescama castigo jtsebonnana. Ndayá Bëngbe Bëtsá šojabacacá, Bëngbe Utabná Jesucristbeyeca bënga chamótsbocama. ¹⁰Cha bëngbiama tojanóbana, bënga cháftaca cányiñe jtseyenama chamotsobenama, masque ainënga o obanënga chamojtsemnëse, cha chaojésabo ora. ¹¹Chíyeca, nyetscanga šmochtsenañëmuaye y šmochtsenájabuachana más jtsošbuáchiyama, ntšamo tšëngaftanga mora ya šmotsamca.

Pablo choca ošbuáchiyënga jábuayenama

¹²Jesucristbeyeca catsátanga, cbontsaïmpadana chašmotsarrespetana chë Bëngbe Bëtsabiama tšëngaftangbeñe trabajayëngbiyoe, y chë Bëngbe Utabná tšëngaftanguentše tojábacacanga uánatsanënga chamotsemnana y ntšamo jtseyenama cmojtsamnana chácmbuayenama. ¹³Cmotsamna chënga jtsarrespetánana y jtšababuányëshanana, ndaye trabajo chënga imojtsamama. Natjëmbana nyetscángaftaca šmochtsiyena.

¹⁴Quem soyënga chašmotsamámna cbontsaïmpadana: jatrabájama ndoñe tmtontsebošëngbiyoe šmochjucacana,

añemo ndbomnéngbiyoe šmochjáñëmuaye, bëtsca ošbuáchiyana ndbomnéngbiyoe šmochjújabuache, y uantadënga nyetscángaftaca šmochtsemna.

¹⁵Cuedado šmochtsebonna, nderado nda bacna soye tbojaborlase, ndocná ndoñe cachcá chabondëtachnënguama. Masna, nye šmochtsentšena nyets tempo tšabe soyënga jtsamama cach tšëngaftanguentšëngaftaca y nyetsca entšangaftácnaca.

¹⁶Nyets tempo oyejuayënga chašmotsemna. ¹⁷Sempre Bëngbe Bëtsáftaca šmochtsencuëntaye.

¹⁸Nyetsca soyënguiñe Bëngbe Bëtsá šmochtsatschuanaye; er chca entsemna ndayá cha yojtseboše, bënga Cristo Jesúsbeñe ošbuachiyëngcá chamotsamama.

¹⁹Ndoñe šmattsama ntšamo chë Uámana Espíritu tšëngaftangbeñe yojtsamcá chaotsopochocama. ²⁰Ndoñe šmattsábotena chë Bëngbe Bëtsabe juabna oyebuambnayëngbe buayenana soye. ²¹Yeuana šmochjájabuoye y šmochjayana, chë Bëngbe Bëtsabe juabna oyebuambnayá yomna ca tojtsichamuabe buayenánama ndegombre Bëngbe Bëtsábiocana tayóbocanama, y chentša tšabe soyënga šmochjobuajo y sempre chca šmochtsama. ²²Nyetsca bacna soyënguentšana šmochtojuánañe.

²³Cach Bëngbe Bëtsá, chë bëngbe ainaniñe tšabe ebionana chamotsebonnana endamá, nyetsca soyiñe tšábenga chacá chacmabiama, y nyets tšëngaftangbe espíritu, ainana y cuerpo chaotsinyena, Bëngbe Utabná Jesucristo chaojésabo orscama; y chora, ntšamo tšëngaftanga šmojamama bacna soyënga yojtsemna ca ndocná chaondayanama. ²⁴Nda tcmojúbuaja chábenga

chašmotsemnama, cha sempre
jtsamana ntšamo tojayancá, y lempe
cha echanjama.

**Inye rueguënga chëngbiana
y jtadióšoftanama**

²⁵ Jesucristbeyeca catšátanga,
Diosmanda, bëngbiámnaca Bëngbe
Bëtsá šmochtseimpadana.

²⁶ Nyetscángbioye mo
Jesucristbeyeca catšatangá
šmochjácheuaye, jtenámochëse,

ntšamo cach tšëngaftangbe
pamíllanga puerte bonshanánaca
šmondbetsacheuanaycá.

²⁷ Cbontsaménda quem tsbuanácha
nyetsca Jesucristbeñe ošbuáchiyënga
chašmëbuáliama, y chca séntsama,
Bëngbe Utabná chca jamama
šojanmandáyeca.

²⁸ Atše séntseimpadana Bëngbe
Utabná Jesucristo, chaoma tšabe
bendicionënga tšëngaftangbeñe
chaotsemnama.